

關愛的故事



人間有情天水圍

我姓張，人地都叫我張老師。以前喺內地我係大學畢業生，而且仲做過模特兒。我嫁咗俾個香港人之後，喺 1992 年從哈爾濱落到嚟香港，同個已經成年嘅女團聚，住喺天水圍，生活都算滿足。

作為一個知識分子，我覺得成日屈喺屋企都好無奈，好想做啲有意義嘅嘢，後來諗到不如教吓天水圍嘅婦女學習正宗普通話，一來可以發揮所長，二來又可以幫吓啲婦女進修。無幾耐，我嘅普通話班已經變得好好出名，唔單止婦女，仲有小朋友都嚟跟我學。1997 年以前，香港經濟好個陣，我嘅普通話班都幫我賺咗唔少錢。

點知經過金融風暴同埋沙士之後，天水圍嘅婦女已經再無多餘嘅錢嚟跟我學普通話。我認識好多好想學，但又唔能夠負擔學費嘅居民，於是開始義務教佢地普通話，甚至唔計較將當年普通話班所賺嘅錢，用番啲嚟我嘅義務教授工作上面，包括影印費啦、送俾小朋友嘅小禮物啦、為婦女而設嘅茶點啦，都係我俾嘅。

本來，我主要喺屋企教授普通話，但由於我仲想將自己嘅興趣，譬如孫子兵法、日文等等，同天水圍嘅婦女分享，等佢地都可以學習吓唔同範疇嘅興趣，生活可以開心啲，因此我愈開愈多班，參加嘅人數亦愈來愈多，但屋企實在招呼唔到咁多人，於是我就四圍搵地方，好在俾我聯絡到天水圍嘅綜合家庭服務中心，佢地願意同我合作，提供場地，等我可以繼續為天水圍嘅居民服務。不過，我仍然堅持以義務性質教授天水圍嘅居民，因為大家都係街坊街里，應該彼此扶持，而且「助人為快樂之本」，我都教得好開心！

(590 字)